

PM galak menteri2 baca buku kata

Abdullah

KUALA LUMPUR, Jumaat — Perdana Menteri, Datuk Seri Dr Mahathir Mohamad menggalakkan menteri kabinetnya membaca buku, demikian kata Menteri di Jabatan Perdana Menteri, Datuk Abdullah Ahmad Badawi, hari ini.

"Kadangkala beliau membeli beberapa naskah buku yang sama dan mengedarkan kepada anggota kabinet serta beberapa pegawai kerajaan," katanya ketika merasmikan Pesta Buku Malaysia 1982 di Universiti Malaya hari ini.

Kira-kira 25,000 tajuk buku dipamerkan oleh 200 penerbit buku termasuk penerbit dari negara-negara ASEAN dan Sri Lanka.

Tujuh ribu tajuk adalah dalam Bahasa Malaysia.

Pesta sembilan hari itu dianjurkan oleh Majlis Kemajuan Buku Kebangsaan Malaysia.

Datuk Abdullah berkata, Datuk Seri Dr Mahathir memang terkenal dengan kepimpinan melalui contoh tauladan.

"Dalam soal membaca, berbagai buku baru mengenai bermacam bidang ilmu pengetahuan dibeli dan dibacanya," jelasnya.

Beliau berkata, Perdana Menteri gemar membaca buku-buku yang berkaitan dengan penguasaan.

Datuk Abdullah menyatakan demikian dalam ucapannya untuk menggalakkan rakyat mencontohi sikap Perdana Menteri supaya rajin membaca di samping menambahkan pengetahuan.

Menurutnya, beliau sendiri juga menerima bungkusan berisi buku dari Perdana Menteri. Dalam bungkusan tersebut tercatat perkataan "harap baca buku ini".

Selain itu, menteri-menteri kabinet juga diberikan senarai buku-buku untuk mereka beli dan baca.

Sementara itu, Datuk Abdullah Ahmad Badawi juga berkata kabinet telah meluluskan peruntukan \$100,000 kepada Majlis Kemajuan Buku Kebangsaan Malaysia (MKKB).